

## VOORWOORD

Hierdie uitgawe van die *Joernaal vir Eietydse Geskiedenis* word opgedra aan prof. Daan Wessels, voormalige hoof van die Departement Politieke Wetenskap aan die Universiteit van die Vrystaat (UV), en tans navorsingsgenoot en studieleier in genoemde departement. Op nasionale vlak het hy erkenning geniet as gerekende vakwetenskaplike binne politiek-wetenskaplike kringe. As lid van die Grondwetlike Komitee van KODESA en konsultant vir die Onafhanklike Verkiesingskommissie het hy 'n belangrike bydrae gelewer tot die proses van grondwetlike hervorming in die aanloop tot die verkiesing van 1994. Hy is bekend vir sy insiggewende politieke kommentaar en ontledings tydens verskeie nasionale en plaaslike verkiesings.

Prof. Wessels het diep spore getrap aan die UV en in die Vrystaatse gemeenskap. Sy breë vakwetenskaplike kennis, mentorskap-kwaliteite en toewyding aan sy studente het van hom 'n gesogte studieleier gemaak. Met meer as 30 proefskrifte, sowat 40 magistrerverhandelings en 20 magister mini-verhandelings is hy maklik een van die mees produktiewe studieleiers wat die UV ooit in diens gehad het! Sy kennis strek oor 'n wye verskeidenheid terreine, soos onder meer konstitusionele teorie en internasionale reg, klassieke politieke filosofie, politieke partye en belangegroepe, kiesstelsels en verkiesingspolitiek, en konstitusies en politieke transformasie.

Die outeurs in hierdie uitgawe bring dus hulde aan hom – nie net as akademikus nie, maar ook as mens, vir sy nederigheid en medemenslikheid. Die bydraers het almal een of ander persoonlike en/of professionele band met prof. Daan – sommige as oudstudente, ander as kollegas.

Die bydraers in hierdie bundel weerspieël van die belangrikste temas wat prof. Wessels in sy navorsing en onderrig aangepak het. Die temas sluit artikels op die gebied van die politieke teorie, dinamika en tendense binne die Suid-Afrikaanse politiek (insluitende grondwetlike ontwikkeling, verkiesings- en etniese politiek, die eise van gesonde owerheidsbestuur, die verhouding tussen demokrasie en binnelandse en buitelandse beleid, asook die transformasie van die Weermag) in. Ander outeurs verskaf weer 'n dieper blik op aanverwante aspekte van die Suid-Afrikaanse historiese konteks en sekuriteitstendense binne die bestek van die kontinent.

Heidi Hudson  
Adjunkredakteur